

放生會序

純陽間放生有會而喜作序曰上天好生死卽生之生種生類
生在死矣是境境含生趣地地具生種時時完生機候足生
意物物懷生根氣氣節生序滅之無可滅之法故有惡類之不
除長之有可長之方故有貴品之恒傳生惡得以放而生生豈
可以不放而卽不生歟嗚呼有放之者曰肥鮮過三寸本與穢
污等口腹何足尊害及諸性命似矣抑知生類中有鉅啖其細
克啄其馴者不可勝量放生者見之將惡其傷生以殺之殺之
不可盡殺而傷生者起曰子放生我獨非生乎主其生者非天
而何夫天未嘗殺惡人以刀斧而惡人不無生卽有殺惡人以
警世亦人之誣天以殺戮子放生而有惡心恐未善子將何辭
嗚呼如是則放生之無益於放當任饕餮之嗜慾不爲過畏慎
惜福以澹泊不爲功矣是真無善惡而廢禍福之報也放之云
者體天地好生之心爾故天不欲人之殺其生也水以生之山
以生之又設江湖河海以藏之峻嶺谷穴以潛之吁嗟抑何人
之不好生而令天地之用心有若是吁嗟人之不好生而天地
乃若是此獨好生是卽水之有可藏山之有可潛而佐天地之
用心也我安得不爲合天地之心以爲心者序